



## TAUGASOA KELISIANO

Pelesitene Rev. Semisi Nimo

FONO LASI XXIII NIUTAŌ

31 Aukuso - 17 Setema

Ko avatu a fakatalofaga mo fakamanuiaga mai i te Ulu Ofisa o te Ekalesia Kelisiano Tuvalu ki taugasoa katoa kola e masani faitau ki te Lama. E maluga te agaga fakafetai lasi, lasi a tatou ki tou Tamana mo tena tausiga ki a tatou i aso takitasi, pela foki mo tena alofa fakasoa mo tena tuku mai ki a tatou i aso katoa, pena foki tena alofa faivasaga mo tena alofa tauanoa; e se mafai ne tatou o tali te lava kae toe kae taetae foki o te alofa atafai o te Atua, "Fakafetai, fakafetai lasi lasi koe tena mai a luga na!"

I te masina tenei o Mee, e masani loa o fakamanatu ne tatou i ei te Aso o te Tala Lei kae fakagaligali ki te Faigataulaga.

E fia avaka ne au te manatu tenei mo fakamanatu ki a tatou a uiga mo tusaga tafasili i te taua ne aumai ne te Tala Lei ki tou Atufenua.

### **Te Olaga 'fakatoka fakalei' ki Fakanofoga mo Tulafono (organized life style)**

E tasi o tusaga tafasili i te gali ne aumai ne te Tala Lei ki tou Atufenua ko te olaga ko mafai o fakatoka fakalei. Ko tena uiga, a te olaga ka isi ne fakatokaga kola e fakavae ko te mea ke maua te filemu, te va lei i tino, te fealofani mo te fakataualofa, te ava o su a tino ki su a tino mo te fai mea fakatasi.

Te Atua tela ne faite ne ia a tino se Atua e ola i loto i fakatokaga o te lei mo te gali (an organized God), e lavea i ana galuega pela foki mo te faitega ne ia te Atupaipai – "Ne kilo atu te Atua i ana mea katoa ne faite, fiafia malosi eiloa a ia" (Ken.1:26).

Ona ko te agasala mo te masei tela ne aumai ne ia ki tino, ne fai ne te Atua se fakatokaga fou mo tino Epelu kola ka fai mo ana fenua fou ko Isalaelu. Ne tuku ne ia a Tulafono e Sefulu ki a Mose mo te pogai loa tenei. (Esoto.20) A tulafono e lima muamua ne fai mo fakatoka te va lei o tino ki te Atua, a ko te toega o tulafono e lima,

## FAKASOLOGA

|                                       |       |
|---------------------------------------|-------|
| Taugasoa<br>Kelisiano.....            | 1-3   |
| Fono Lasi NTO.....                    | 3     |
| Lauga.....                            | 3-4   |
| Malaga ki<br>Zambia.....              | 4-6   |
| Tusi Tapu Fou.....                    | 7     |
| Fakafesagai mo<br>Talitonuga fou..... | 7-9   |
| Sukesukega Tusi<br>Tapu.....          | 9-11  |
| Mo Pagota.....                        | 11-12 |
| Akoakoga<br>Musika.....               | 12-13 |
| Malaga ki<br>Niusila.....             | 13-14 |
| 50 Tausaga<br>Kakeatu.....            | 14-15 |

ne faite mo tausī ke gali a te va o tino ki sua tino mo tena va ki te Atua. Ke kilo ake tatou ki tulafono e lima fakaoti o Tulafono e Sefulu, mai i faitau kona (Eso.20:12-17).

F.12. Ke ava koutou ki outou tamana mo otou matua ...

13. Sa tatino

14. Sa mulilua

15. Sa kaisoa

16. Sa molimau fakaloiloi ne koutou a nisi tino

17. Sa manako koutou ki fale o nisi tino; sa manako foki ki avaga a nisi tino

E lavea foki i loto i tusitusiga a tusi tala i Levitiko , Numela mo Teutelenome i te Feagaiga Mua, mo tusi a Evagalia mo tusi a Paulo i te Feagaiga Fou a tulafono mo fakanofoga kola e fakatulaga maluga i ei te nofo lei o tino i fakai, malo mo fenua.

Te okomaiga o Tala Lei ki Tuvalu, a tino e ola i te olaga faivalevale, fai fili mo te fai taua. E pokotia a olaga o tino ona e seai ne tulafono io me ne fakanofoga mautinoa mo tausī te filemu. 'A tou malosī ko tou saolotoga o fai a mea e manako koe ki ei' e tena te tulafono e ola ei a tino i aso kona ka koi tuai o oko mai a te Tala Lei.

Ne lavea te lasi o te fuliga a te Tala Lei ki olaga o tino, i olotou uiga mo olotou faifaiga. Ne lavea i ei te gali o te olaga mo te ola filemu o tino, ko fou a tino mo olotou uiga mo faiga, kae ko tonu i ei me aumai ne te Tala Lei a fakatokaga lei ki tino.

Te mea ko tupu i aso nei, ko te toe mafuli a mafaufauga o tino, kae ko se amanaia ne tou tino i Tuvalu a fakanofoga mo Tulafono kola e fakavae ki ei te olaga fakatoka fakalei kola ne tuku mai ki a tatou ne Tala Lei, e pela mo tusitusiga i Tulafono e Sefulu (Eso.20). A tino ko foki o fai a faifaiga mo amioga kola ne fai i aso taumua o te pouliga

Konei a nisi mea kola ko oko mai ki loto i Tuvalu, ka ko aumai ne latou a uiga fou kola e pokotia i ei a fakatokaga ne fai ne Tala Lei ki te fakatokaga o te olaga lei, filemu mo te amiotonu i mua o te Atua pela foki te valei o sua tino ki sua tino.

a. Atiakega fou tau akoakoga – ko gasolo loa o lasi a te faka'se ne te poto mo te malamalama a uiga mo faifaiga kola e akoako ne te Tala Lei i aso mua mo aso nei. E isi foki se vaega poto tela e fakase loa ne ia a te tonu o tala o te Tala Lei, ka ko faigata i a ia o talia te Tala Lei. Te sua vaega kiloga e aumai ne te sua vaega poto o te mafaufau, me lei fua ma fakamafuli malie a faiga mo akoakoga a te Tala Lei ke fetauī mo manakoga o aso nei.

e. Ko vaega atamai mo poto i atiakega (technology) – te vaega tenei e se amanaia ne ia a tuakoi kola ne fakatakato ne te Tala Lei e uiga mo taimi, avanoaga mo

saolotoga. A tino ko galue i aso katoa, se amanaia a taimi o talosaga, lotu i Aso Tolu mo Aso Tapu. E tauloto ne tou tino a tu mo aga faka atiakega, e pela mo peiga o vaega gatu (fashion), te kamuga o ulu, te fakavalevale o togi kae tafao ki laptop, I-pad, mobile phone, mo vaega mea katoa pena (computer fever)

i. Ko te poto i mea tau fiafiaga – falesaka pouli mo moli malapulapu, musika taki pakalaga kae fanau mai ne ia a pokotiaga tau selamete, faitama foliki mo te inu kava faka-taka-lialia.

o. Te poto i tafaoga kemupolo – Tiga loa e fai mai me seai se tulafono a te EKT mo tena malosī o fakatapu a tafaoga tau kemupolo, ka ko lavea atu nei a te uke o fakalavelave e pokotia ei a tino tafao i tafaoga tupe. E lasi te matakai mo te mata'no'no o tino tafao ki tupe a tino kola ne lucky, pela foki mo uiga masei pela mo te amio pelo mo amioga masei kola e fai ne tino tafao – te galo leva o koe mai te fale kae tiaki a tamaliki i a latou eiloa – ko ala ei a tamaliki o olo valevale fua, kae ko mafai ei o tupu a fakalavelave e uke. I te sua feitu, a Tala lei ko uke i loto i Tuvalu, kae e 'se galue tasi, e 'se fealofani kae fakatau salasala pona o sua lotu ki sua lotu. Ko akoakoga fou mo tulaga fou konei ko aumai ne lotu fou konei ko

fepakipaki mo nisi fakamatalaga. Tokouke ko numi kae ko se iloa o fai se filifiliga tonu me tefea te fakatokaga e lei?

Te tulaga taua e tau o fakamalosi ne tatou i te vaitau tenei ko te foki ki Tusi Tapu te Muna a te Atua. E tenei loa te fakatokaga tonu mo tatou i aso nei; kae ke faitau tatou mo te maina, ko te mea ke akoako tatou ne te Muna a te Atua.

Faitau ki te Tusi Tapu ke lagona ne koe te leo o te Atua e auala i a Iesu e faipati mai ki a koe. Faitau ki te Tusi Tapu ke sulugina a koe ne te mainaga o te Iesu te Mainaga o te Lalolagi. Faitau ki te Tusi Tapu me ko te Pou Kaumana mo te Pou Afi o aso nei, e takitaki ne ia tatou ki te fenua o fakamoemoega. Faitau ki te Tusi Tapu ke maua ne koe te saolotoga tonu tela e aumai ne Iesu Keliso. Faitau ki te Tusi Tapu me maua i ei te fakatokaga tonu mo tou olaga. Ke manuia te faigamalaga i loto i masina koi toe o te tausaga tenei.

## **FAKATOKAGA MO TE FONO LASI XXIII NIUTAO**

*Rev. Tafue Lusama  
Failautusi Aoao*

E fakatalofa atu ki te 'malu o te Ekalesia pela foki mo taugasoa faitau lama. E se fakafolikigina te fakafetai ki te Atua alofa ko toe mafai ne

tatou o oko mai ki XXIII (23) Fono Lasi a te 'tou Ekalesia. Mai te fono i Nanumea ki te fono tenei i Niutao, e talitonu toku loto me se malaga e foliga mai e toetoe fua, kae kafai e nofo tatou o mafaufau, ko tusa nei mo te lua tausaga ne malaga mai tatou mai Nanumea ki Niutao. E talitonu foki au, me uke a mauga ne kake ne 'tou Ekalesia, Kaiga, Fenua pena foki tatou takitoko tasi, e pena foki a vanu e uke ne saalegina ne tatou, kae fakafetai tatou ki te Atua me e tumau e iloa tona alofa ki te se gata mai.

I te avanoga tenei, e fiafia au o fakalauiloa atu ki te 'malu o te Ekalesia me kooti ne iku a aso kola ka fai ei a te Fono Lasi XXIII i te 'ta fenua ko Niutao. Te fono ka tala aloaia i te po 31 Aukuso kae ka pono i te po 17 o Setema 2014. Ko te akai mai konei, ke tuku ne tatou ki te Atua te fakamoemoega lasi tenei o te 'tou Ekalesia ko te mea ke mafai o taunuu mo te manuia aunoa mo ne mala. Ke alofagina ne te Atua a fakatokatokaga a te Ekalesia ki tena Fono Lasi e pena foki te Ekalesia mo te Fenua o tatou i Niutao. Ke manuia tatou i te alofa o te Atua.

# **LAUGA**

*Rev. Fuiono Piita*

**Tusi Faitau:** Epelu 11:1-6

Matua.v,6. E seai se tino e mafai ne ia o fakafiafia ate Atua, e aunoa mo te fakatuanaki. So se tino e vau ki te Atua, e tau mo ia o fakatuanaki, me i ai te Atua. Kae e tuku atu foki ne ia ate tau lei ki tino kola e salasala ki a Ia.

Ulu ote lauga. **OLA ITE FAKATUANAKI.**

A te fakatuanaki e pela mo te mau a Paulo, e fai mai, ite fakatuanaki, ko te talitonu ki mea e fakamoemoe tatou ki ei, kae maise ko te talitonu, ki mea e seki matea ki mata. A te fakatuanaki foki se mea alofa mai te Atua mote lalolagi katoa, tela ne auala mai ia Keliso Iesu, i tena mate mo tena toetu manumalo.

E tenei tonu te fakaolataga ne fakatoka ne te Atua mo tatou, kae e tau o talia ne tatou mo te fakafetai, kae talitonu kiei mo te fakamaoni.

Fai mai te matua a tatou, E seai se tino e mafai neia o fakafiafia te Atua e aunoa mo te fakatuanaki, sose tino e vau ki te Atua, e tau mo ia o fakatuanaki ki a Ia.

Te lalolagi e ola tatou i ei, se lalolagi o fuifaiga mo fakasoosoga e uke, e

pokotia foki ei tou olaga tautua mo te Aliko, e se gata iei, e aumai foki ne ia te olaga manavase mo te se toka o te loto.

Taina kauvaka, au e talitonu me i te olaga fakakauvaka, ese se olaga faigofie, kae se olaga e fetau faeloa tatou mo faigataaga mo fakaososoga e uke o te olaga nei, tela i nisi taimi ko se mafai ne tatou o fakafeagai, e oko mai foki ei kia tatou te manavase mo te se toka o te loto.

Ko te fesili mo tatou, E mata ka ola faeloa tatou ise olaga manavase, mote seai ose tokagamalie? lo me tau mo tatou o ola i te olaga fakatuanaki? Tela kote fakatuanaki o tatou kite alofa faivasaga ote Atua, e manumalo ei tatou?

Fai mai te poto ko Solomona, Talitonu ki te Aliko mo tou loto katoa, sa fakalagolago lele eiloa ki tou iloa, Ke masaua faeloa ne koe te Aliko i mea katoa e fai ne koe kae ka fakaasi atu ne la ki a koe te auala tonu. Fai mai te LAUGA, OLA ITE FAKATUANAKI.

Fanau kauvaka a Tuvalu, e tenei te loto o te Atua mo tatou ana fanau, masaua i te fakatuanaki kia Iesu, e fakafiafia ne ia te Atua, tela e fakamagalalo ne ia tou agasala, kae tuku mai foki ne la kia tatou a te ola e se gata mai.

Ese gata i ei, e aumai foki ne ia kia tatou ate manumalo, e tusa ko te olaga fuifai kae faigata e ola tatou i ei.

Fai mai 1Ioane 5.4, Me ko sose fanau a te Atua, e mafai eiloa ne ia o fakatakavale te lalolagi, tenei te auala e mafai ei o manumalo tatou i te lalolagi, ko te tou fakatuanaki. Fai mai te lauga, OLA I TE FAKATUANAKI.

E tenei foki loa te olaga ne olagina ne te tou Fakaola ko Iesu Keliso, ne manumalo ei a ia, ite fakataunuga ote loto o tena Tamana. Ne mate fakalumalumagina ite Sataulo, kae ne

toetu manumalo, mai te mate, kote mea ke maua ne koe mo au ate ola ese gata mai.

Ko tena manumalo, e manumalo foki ei tatou ite olaga nei, kite se gata mai.

Ke manuia koutou Kauvaka ite Alofa ote Atua. Amene.

## **MALAGA KI ZAMBIA**

### **Sulufaiga Uota**

Te malaga ki Zambia ona ko tulaga o polokalame a te Council for World Mission (CWM) tela ne maua ne au se avanoaga e tasi i ei. Te igoa o te polokalame tenei ko te “Face to Face” Programme. Se polokalame tela e lasi te kau ki ei tamaliki koi akoga i loto i akoga faka faifeau. E tusa mo te toko 10 matou ne fakatasi ki loto i te polokalame tenei. Tokolua maua mai te Pasefika tela sua tamaliki se tamaliki fafine mai te akoga faka faifeau o te Ekalesia Poletisano i Kiribati. Toko tolu sui mai India e tokolua tamaliki tagata kae tokotasi te tamaliki fafine. E tokolua mai Zambia, tokotasi te tagata kae tokotasi foki te fafine. E tokotasi mai Korea se tagata, tokotasi mai Matakasa se tagata mo te sua tagata ei mai Mozambique kae akoga i South Africa. Kona matou ne kaufakatasi atu ki te polokalame. E isi ne tamaliki mai Taiwan ne maua foki ne latou avanoaga konei mai te CWM kae ne se mafai o oko atu ona ko tulaga o visa e faigata ne se mafai o maua kae ko kamata te polokalame.

Ne fakatoka a te polokalame kae fakatupe foki ne te CWM, ko tulaga o fakatokatokaga ke mafai o fakatele te polokalame ne fakatoka ne te Ekalesia Kaufakatasi o Zambia i te akoga faka faifeau a latou. E tasi te vaiaso ne fai ei ne fakamatalaga mo te olaga o tino i Zambia (orientation), nea

fakalavelave i tulaga tau te ola kae maise ei ko masaki pisi kola e lasi te afaina ei ola o tino i te fenua. Ko tulaga mativa o tino tonu o te fenua. Ko fakamaseiga ki te enivalomene e pena foki ki tulaga o tino mai tua o te atufenua kola e fai pisinisi e faka aoga ei ne latou a maumea totino o te fenua, ko lotu kola e fai mo fakalavelave ki te olaga talitonu o tino i loto i te Ekalesia Kaufakatasi Zambia. A te polokalame la tenei e faka autu tonu loa mo Ekalesia kola e kau i lalo i te CWM. Kae se fakatokaga mo latou kola e fia galue faka misionale i fenua o Afelika. Aua Zambia se tasi o fenua o Afelika, I toku talitonu kafai mo latou kola e fia galue faka misionale i fenua o Afelika ko mafai o isi se ata o fenua o Afelika mo tuu mo faifaiga e penei mo te tauloto ne fai i loto i te polokalame tenei.

E tolu vaiaso ne nofo ei matou i loto i Ekalesia kola e tuu i town, kae te nofo o matou penei e nofo matou i lalo I fesoasoani o Ekalesia konei mo se tama fesoasoani o te polokalame. Kae ko te sua lua vaiaso ne nofo i loto i Ekalesia i tua o towns. Se tulaga e gali aua ne mafai o tauloto a tuu mo faifaiga faka Zambia, ne mafai foki o faipati nai pati o se gana e tasi tela e faipatigina i te koga koga tela ne nofo ei matou. Tulaga o te olaga faka alofa o tino, nai pogai ne mafai o maua atu i pogai o te fakalofa o tino. Tamaliki ko seai ne matua me ko mate, nisi tamaliki ko oti ne tiaki ne matua kae ko nofo i lalo i te tausiga a tupuna kola ko matua ko se loko lava te malosi.

E uke fakalavelave e mafua mai i se pokotiaga e tasi o te olaga kae ko felefele valevale. Nisi fakalavelave ko te masaki tenei ko te AIDS io me ko te selamete. E lasi kii foki te pokotiaga ki luga i olaga o tino. Toe titi kae sautala koe mo tino e tinogafulu i se vaiaso kae fakaasi atu a tena avaga

tagata io me fafine ne mate ona ko te masaki tenei. Io me fai mai se tamaliki ona matua ne mate katoa ona ko te masaki tenei ko te selamete. Ona la ko tulaga o fakalavelave penei e mafai o fakamafua ei nisi fakalavelave pela, tamaliki ka se lei akoakoga.

Tamaliki ka kau ki loto i ne potukau kola ko olo o kaisoa. Kona tulaga o te olaga tela e lavea ei te faigata. Mo te fesili faeloa e tauave me sea la te tulaga o te Ekalesia o agai atu mo fakalavelave konei? Se tulaga e matagali i te kilo atu aua te Ekalesia mo nisi fakapotoptoga se kau ki te Malo fakatasi mo te Malo e galue tasi o fesoasoani ki tino fesoasoani kola e fai ne fakapotopotoga mo Ekalesia e pena foki te Malo ne tulaga kola e faka taua kae faka maluga iei te taua o tino i loto i te atufenua. Kae ko tino i nisi taimi ko latou foki loa e taumafai o afuli a fakalavelave ko latou ke pokotia iei. Ia mo tulaga la o fesoasoani konei, e tuu i tulaga o fakamalosiga pena foki fakatokaga o faite ne tulafono e toe puipui atili ei a te ola lei o tino takitokotasi.

A te taimi o oku ne nofo ei au o tauloto tulaga o te olaga faka Zambia i te Ekalesia e fakaigoa ko te Bethel UCZ (United Church of Zambia) congregation. E uke tulaga faigata o te olaga o tino e lavea atu, penei mo tino e faka aoga ne latou te vaikeli o te faifeau mo asu vai latou. I taku siliga ki te faifeau, e fai mai me se ne tino i loto i tena Ekalesia me ne tuakoi fua o latou. Ona ko tulaga e kilo ki ei me i te faifeau e tau o alofa kae kaimalie ki sose tino tena te mea e faka aoga ei ne latou tena vaikeli. A ko vaikeli ne mea fua e mafai o faite, kae ona la ko tulaga o te olaga e faigata i mea tau sene. Tena te pogai e faka aoga ei ne

latou a te vaikeli a te faifeau. A te laufenua e lasi, kae uke a koga koga e too malo tela tai faigata foki te fakatoka ke fai ei ne fatoaga, sei vaegana ke fakamaua ne vai e uke mo fakatoka ne fatoaga. I tulaga o fenua lasi e tau o isi ne vai kola e tuku i loto i ne koga e fakaigoa me ne reservoir, konei koga koga kola e tau o tausii ei vai ke ko aumai ei ki loto I kaiga takitasi. E manakogina foki ne sene lasi mo fakatoka ne koga koga penei, e mafai o tai lasi te koga koga tenei e penei mo te tolu kuata te lasi o te tou atufenua.

Te sua vaega o te olaga tela ne matea ne au ko te faka aloalo a latou, e kese mao kii loa tulaga o te faka aloalo a latou e penei mo tatou. Taku mea ne lavea i te Ekalesia tela ne nofo ei au, te olaga usu pese a latou e kese foki mo tulaga o tatou. Tela kafai e oti a lotu, a te kau kola ne fai tofiga katoa e tau o aumai tasi i se laina kae ko te kaulotu e usu pese kae solo ki tua. E isi foki ne tino e taki ne latou te laina tenei ko olo ei o tuu i tua ke solo atu te kau fai tofiga ko solo ei ki tua i se koga koga o faipati katoa ko foki ei ki fale. E kese kii tulaga faka aloalo a latou i te fakapaupau ki tulaga o fakaaloalo a tatou i taimi o tapuakiga fai.

Te Ekalesia i te lua tela ne nofo au i ei mo se lua vaiaso, ne koga koga i fakai loa faka Zambia tela e tuakoi ki Zimbwabwe. E vela kii loa te koga tenei kae pili ki te vaitafe kola e isi ne manu lasi e ola i te vaitafe (rhinoceros, kolokolotaila, buffalos e mafai o kau mai sua fenua ki loto i fakai pili konei o Zambia). A te olaga faka Zambia loa i fakai foliki ne oko ki ei te matamataga o tauloto. E lasi kii te ola fakalofa ona la ko te laukele ko too malo seai ne vai lei e mafai ei o fakasusu te laukele. E ui ei me pili ki te vaitafe e tai faigata loa te fakatokaga ona la me mauga te laufenua, tela la ko te aumaiga o vai i tama hoses kola e mafai ne latou o togi e se lei. Ko vailakau ke mafai o fakaola lei a

lakau I taimi o taula e se lava lei foki. Konei tulaga uke kola e mafai ei ne tatou o lavea te faigata o te olaga i te fenua tenei. E isi foki se fakai foliki i koga koga konei, tela ne kave au ne te faifeau ke matea ne au. Ko tusa mo te 5 tausaga ne tapuaki ei te kaulotu tenei i lalo o se lakau lasi, kola ana maga e fakamalu latou iei mo fai olotou tapuakiga. Kafai ko too vaiua, ko seai se lotu ona la me ko too vaiua. Ne isi ne sene ne faka mealofa ne te potukau o te Face to Face 2013 mo te faitega o te Falesaa o te fakai tenei.

I te otiga o te lima vaiaso tela ne nofo ei matou ki ne Ekalesia. Ne isi se taimi ne fetau ei matou mo te Moderator (ia tatou ko te Pelesitene) o te Ekalesia Kaufakatasi o Zambia. Ne fakamatalatala mai ne ia tulaga o te Ekalesia kae maise ei ko fakamoemoega o latou mo atiakega a latou kae maise ki se fale e uke ana fata ko te mea ke mafai o maua ne sene e fesoasoani ki te Ekalesia. Ne fakaasi aka foki ne ia te manakoga o te Ekalesia a latou mo ne tino galue faka misionale. Ne fakaotioti te polokalame ki se 5 aso ne kave ei matou ne te takitaki o te polokalame se faiakogail te akoga faka faifeau mo te sua faiakoga ko te pule mua o te akoga faka faifeau. Te fafine e galue mo te polokalame penei i te Ulu Ofisa o te CWM i Singapore mo te sua tokolua tino galue i te akoga faka faifeau, ki te Victoria.

Te koga tenei ko te laumua o tino matamata (tourists) o Zambia. A te lima o aso konei, ne isi se motou taimi o avatu o onono ki te Victoria fall tela ko te tuakoi foki loa o Zambia ki Zimbwabwe. Ne isi foki se taimi o matou o onono ki te faama kolokolotaila. Ko koga e nofo ei manu o te vao o Zambia, e pena foki o asi atu ki se fakai e tasi o Zambia tela ne fetau ei matou mo tena Aliko. E lasi te faipati faka palagi o tino i te fenua aua a ia se tasi o fenua ne nofo i lalo o Peletania. Ne foki matou ki te akoga faka faifeau a te Ekalesia Kaufakatasi o Zambia tela ne pono ei te polokalame ne te Pule Faiakoga o te Akoga faka Faifeau mo se tama kaiga mo fakafetai lasi ne fai ne tino galue mo

olotou kaiga mo matou kola ne kaufakatasi ki te polokame. Vikia te alofa o te Atua aua i tona alofa mo tena kaufakatasi ne tokagamalie ei te polokalame ne fakatasi atu ki ei.

## TALA O TE TUSI TAPU – LOMIGA FOU

Rev. Pitoi Etuati

Talofa a malu o koulua tino faitau lama!

Au e talitonu me i te manatu io me ko te ikuga ke toe fai se lomiga lua o te Tusi Tapu mua, se manatu e uke a taimi ne avake sale i fonotaga a te Ekalesia Kelisainao i tausaga e uke. I te vaaitaimi la tenei, ko taumafai au o fakaoko atu se tala toetoe e uiga mo te galuega tenei, kite fakatokaga o te Tusi Tapu mua ke toe fai se lomiga ki ei.

A te aumaiga o te kopi (copy) o te lomiga mua a tatou ne scan mai loa i tua i Egelani, aua tenei te ofisa e tausi ne ia a te kopi o te tusi tapu mua a tatou. Se taimi e tai leva ne fai ei te galuega tenei o fakaoko mai a tusi katoa o te tusi tapu mua a tatou ki te ulu ofisa o tusi tapu o te Pasefika I Fiti, oti ko fakaoko mai iei i te meli iti ki konei.

Ia ne katoatoa mai katoa a tusi o te tusi tapu i te masina o mati i tausaga nei. Konei la koi fai nei ki ei a galuega ki te fakatonutonuga o te tusi tapu. Ia kae fakatautau ko te masina o mee I tausaga nei ka vau I ei te Failautusi I te ulu ofisa o Tusi tapu o te pasefika ke galue fakatasi maua i konei.

A ia ka lloilo maea ne ia a galuega kola kooti ne fai ki te Tusi Tapu a tatou tenei. Kafai e tonu e iloa a te galuega ki te fakatonutonuga o te Tusi Tapu. Ko fai ei ki ei a te toe galuega fakaotioti tela kote faitau fakasaosao ( proof reading) o te Tusi Tapu koi tuai o ave ki te koga tela ka fai ei te lomiga.

Ko galuega kola ne fai ki te tusi tapu tenei,

ko fuaiupu i mataupu kola ne tuku tasi i te lomiga mua. Nei ko oti ne vaevae ke sae lo a fuaiupu takitasi ia latou e iloa. Te lasiga o tusi I loto I te Tusi Tapu, e uke a fuaiupu e tuku tasi. Te ata fakatau kafai e kilo koulua ki te Numela 1:20- 46 e tuku tasi pela me se fuaiupu e tasi. I te lomiga fou tenei ka fai ko oti ne vaevae ke tu taki tasi loa a foaiupu Ko nisi mea ko tusi siki ko mafai o maua i loto i tusi tapu tenei.

Ko foliga o te lua o Tusi Tapu tenei ma lomi, e fakatautau ke pela e iloa mo te tusi tapu fou a Samoa. Ko ikuga la e fakaiku ne te komiti teuteu mai luga o tupe ka fakamaumau ki te lomiga tenei.

Ko avake se ata penei aua ko oti ne lavea ne tatou a te Tusi Tapu Tauloto a tatou pela me se loa ko lei ana laupepa maise foki ko ana fakavaka pela me olo fua o matafi. Ko tena uiga e pela me se fetau mot e tau o fenua penei.

Mo koutou kola e siki lavea ne koutou te lomiga fou a Samoa tenei. E foliki ifo I te tusi Tapu tauloto a tatou. Au e talitonu me tai pau e iloa mo te tusi Pese fou a tatou a te tusi tapu fou tenei a Samoa. Ka manuia te fakamoemoega tenei o te ata o te tou tusi tapu fou, ko tai mama ki te aveave a tatou ki lotu fakatasi mo te tusi pese.

Takaga faitau lama kaati te na te tala o te Tusi tapu fou a tatou. E talosia fakatasi ne tatou ke solosolo manuia te galuega tenei I te fesoasoani mai o te Agaga o te Atua. Talosia foki ne tatou ko latou kola e fia fesoasoani mai o fakatupe te galuega tenei ke tokouke.

## FAKAFESAGAI MO NIISI

### TALITONUGA

Rev. Fitolau Puapua

E maluga vikiga mo tavaega o tou Tamana i te lagi ko mafai o toe fakatasi tatou i te tou laupepa masani tenei. I te lomiga tenei o te Lama ka onono tatou ki te Mataupu e uiga mo *“niisi akoakoga a te Lotu Mamona*

kola e se fakaasi atu ki a koe i te taimi muamua e sausautala atu latou ki a koe e uiga mo te Lotu Mamona.” Ko te uiga o taku fakamatalaga, i so se taimi e fanatu se misionale Mamona ki tou fale kae taumafai o fakamasani atu ki a koe me ko tou kaiga, e se mafai ne ia o fakamatala atu a akoakoga konei a latou. Kae e masani o tuku eiloa ne latou ko koe ke too katoatoa atu ki te olotou lotu kae kamata o fakamatalatala atu ne latou a mea konei. Au e talitonu ko malamalama koe me kai a e fai ne latou a uiga penei. Konei a akoakoga a te Lotu Mamona e se mafai o fakaasi atu ki a koe:

1. E se mafai ne latou o fakaasi atu ki a koe i te Atua tela e tapuaki latou ki ei, e se ko ia eiloa ko te Atua. I akoakoga a Iosefa Simati (Joseph Smith) ne fakaasi ne ia me i te Atua tela e tapuaki latou ki ei e se ko te Atua tela e ola mai i te vavau ki te favavau, io me ola mai i te kamataga ki te segata mai. Ko te Atua e seai sena gatamaiga, Ikai. I ana muna, “A tatou ne manatu pela io me ne fai saale pela i te Atua, ko te Atua tela a ia e mai i te segatamai. Au e se talia ne au a te talitonuga tena kae ave keatea a te veli ko te mea ke lavea ne koutou.” (Akoakoga a Iosefa Simati pg 345) Iosefa Simati e talitonu i te Atua se tagata tela ne ola i te su a paneta kae ne vau ki te lalolagi tenei. Tenei te pogai e se talia ne Iosefa Simati tela ko ia ne fakatu ne ia te Lotu Mamona, me i te Atua pela mo talitonuga kelisiano se Atua ne ola mai i te kamataga kae seki faite te lagi mo te lalolagi kae e ola eiloa seai sena gatamaiga.

2. E se talia foki ne ne latou ke fakaasi atu ki a koe me ia latou e talitonu i a Iesu ko te taina faka te agaga o Satani. Ne akoako ne Milton R Hunter i tena tusi ‘Gospel through the Ages’ i te

filifiliga o Iesu ke fai a ia mo Fakaola o te lalolagi ne fakataufai foki ki ei se tokotasi o tamaliki a te Atua ke maua ne ia te tofiga tena, tela a ia e fakaigoa ki a Lusifelo. A ia ko te tamaliki o te malama io me ko te taeao. A ia e uiga masei kae fakaoga auala masei ke maua ne ia a te pule mo te malosi mo te ‘malu. A te taina fakate-agaga tenei o Iesu ne taumafai malosi kii ke fai a ia mo Fakaola o te lalolagi. (Akoakoga Milton R Hunter’ Gospel through the Ages: pg 15)

3. E se mafai foki o fakailoa atu ki a koe e pela mo talitonuga a te Mamona, me ia Iesu e tokouke ana avaga. I tusitusiga a Orson Hyde: Journal of discourses 2. 210) Ana muna penei “Ko oti ne iloa ne au me i niisi o tusitusiga mai fenua ki te saegala ne fakaasi ne latou me ia au se tino muna masei ki te Atua i aku muna ne fai i aku akoakoga ki te mataupu e uiga mo “Fakaipoipoga, me i a Iesu ne avaga i Kana i Kalilaia. Ko Malia, mo Maleta mo niisi o fafine aka, ko ana avaga kona kae ne fua foki ana tama i fafine kona.” (Orson Hyde: Journal of Discourses 2. 210) Ne fakaasi aka ne Jedediah M Grant i tena tusi Journal of Discourses, 1: 346) me e tenei tonu te pogai ne fakasataulo ei ne sotia Loma a Iesu, ona me a ia e tokouke ana avaga. I se takutinoga a se tagata poto e tokotasi i te vaitaimi tenei, “ a te talitonuga ki te uluola o te kaiga mai i te tokouke o au avaga, ko te mafuaga tena o te tamate o Iesu mo ana taugaso. A latou e pela eiloa me ne tino mamona. (Jedediah M Grant. Journal of Discourses: 1. 346)

4. Ko te su a talitonuga a te lotu tenei e se mafai ne latou o fakaasi atu me ko silia mo te 50 tausaga ne talai ne te Mamona me ia Atamu ko te Atua eiloa kae ko ia foki eiloa ko te Atua tela e seai ake foki i ona tafa tela e fai ne tatou. Te akoakoga tenei a te Mamona e fakavae mai i tusitusiga a



Brigham Young, me i ana muna penei “Nei fakalogo mai tino o te lalolagi, lutaia mo tino o fenua fakatea, te kau Tapu mo tino agasala! I te taimi ne vau ei tou tamana ko Atamu ki te fatoaga o Etena, ne vau a ia ki te fatoaga mo tena foitino atua, kae aumai ne ia tokotasi o ana avaga ko Eva. A ia ne fesoasoani o fai te lalolagi tenei kae ke pulepule ne ia. A ia ko Mikaele ko te Agelu sili ko ia tela mai ana mua eiloa (Ancient of Days) tela ne valogina kae tusitusi ki ei a tino ‘malu. A ia ko te tou Tamana, mo te tou Atua kae ko te Atua fua a ia tela e fai mo tatou. ( Brigham Young Journal of Discourses 1: 50)

Ne tusi foki ne se tokotasi o te lotu tenei e fakaigoa kia Herber C Kimball penei ana akoakoga; Ko oti ne tauloto ne au mai i mea ne iloa ne au me e isi, kae e tasi eiloa a te Atua tela e fakatumau ne ia a tino o te lalolagi tenei kae ko ia foki ko te Atua tela e fakatumau ne ia a te lalolagi..ko te tagata muamua. Te tino muamua tenei ne uga mai a tena tamaliki tagata totino mo fakaola a te lalolagi ( Heber C Kimball, Journal of Discourses 4:1)

5. *E se mafai foki ne latou o fakailoa atu ki a koe me ia Brigham Young tela ko te Pelesitene muamua eiloa o te Lotu Mamona ne akoako ne ia me e tau mo tino o avaga ke uke olotou avaga. (Polygamy) ko te mea ke mafai ne te tagata o fai mo Atua.* E fai mai a akoakoga a Brigham Young ana muna, “Ko tino fua kola ka fai a latou mo Atua, io me ko tamaliki a te Atua ko latou fua kola e tokouke olotou avaga io me ko tino kola e talia ne latou a te polygamy.” A te polygamy e se pela ko mate tou avaga fafine ko fano koe tagata o toe sala tou avaga, ikai kae ko te nofo tasi koe mo ou avaga fakasalasala e uke. ( Journal of Discourses 11: 269) Talitonuga a Mamona ko te uke o au avaga fakasalasala e nofo mo koe ko fai ei koe

pela me se Atua io me ko fai a koe mo tama a te Atua.

6. *E se mafai foki ne latou o fakailoa atu ki a koe me i te Tusi a te Mamona io me ko Tusi Tapu a te Mamona se maua i ei a akoakoga ki te talitonuga a te Mamona.* I niisi fakamunaga e uke a vaega o te Tusi Tapu tenei a te Mamona e fetenaki mo akoakoga faka-mataupusilisili/ Theology a te Lotu Mamona. (Toe fakasoko atu i te sua Lama)

## SUKESUKEGA KI TE TUSI TAPU

Rev. Fitolau Puapua

Tusi Faitau: 1 TIMOTEO 2: 11-15

**FESILI:** E MATA TE FAIPATIGA TENEI A PAULO KO TE POGAI TONU TENEI E TAU EI O SE ‘FAU FAFINE KE FAI MO FAIFEAU?

Te fakamoemoega o te sukesukega ke mafai o fakamaina kae fakamatala fakalei te faipatiga tenei a Paulo. Se a tonu te uiga o te faipatiga tenei.

1. E taua a te faipatiga muamua eiloa a Paulo i te ff 11 tela se fakatonuga, tela e fai mai Paulo i “Fafine e tau mo latou o tauloto. E tau o tauloto ne fafine a te amioga filemu mo te loto malalo.” A te faipatiga tenei a Paulo e taua ona me i tusitusiga faka-lutaia..fakaasi ne faiakoga i lelusalema me “*e sili atu a te tusi tulafono manafai e ave o sunu i lo o te ave ke faitau kae tauloto ne fafine*” E manino mai i konei me ola eiloa a te lagona se amanaia ne talitonuga faka-lutaia ko fafine ke tauloto. Masaua te muna ‘sofia tela ko te poto o te Atua e aumai i te tulaga fafine.(ferminine neuter). E tokouke tamaliki fafine e fakaigoa kia sofia..ona se muna e

fesokotaki mo te tulaga o se fafine. Kae sofia ko tena uiga ko te poto o te Atua.(Wisdom) Te fafine me ko te matua i talitonuga faka-lutaia e gata loa i te fale tena taaua. Te fafine e se taulia i koga e nofo ei tagata aua latou ko tausi o tamaliki mo galuega o te fale kae e pule ne te tagata. Se gata foki e pule ne tagata kae e se iloa ne ia o faitau me se fakaakoga. Konei a lagona e ola i tino lutaia, kae e aumai ne te fafine a te poto o te Atua.

2. Kafai e kilokilo tatou ki te fakalavelave tenei e tupu i Efeso e lavea ne tatou me ko takitakisegina a fafine i te manatu me e maua ne latou a te avanoaga o tauloto kae akoako atu a te mea tonu ko te fakaasiga foki me e maluga a te tulaga o latou i lo o tagata. (2 Timoteo 3: ff.6-7)...Ko fafine kola e taumafai ke tauloto ne latou a te meatonu, kae e se mafai lele e iloa o maua ne latou a te meatonu. E tenei tonu a te fakalavelave e tupu i Efeso. Ko isi ne fafine ko ola ia latou a lagona o te manatu me i te avanoa ko tauloto ne latou a te mea tonu, ko te manatu foki tena me e sili atu a te tulaga o latou i tagata i loto i te Ekalesia.

3. E taua ia a te ff. E 11 me ko te fakaasiga o manatu o Paulo ki te tulaga tenei. I manatu o Paulo e talia ne ia ke tauloto a fafine kae ke tauloto ne matua a amioga filemu mo te loto maualalo. Ke lavea ne tatou a te faipatiga tenei a Paulo se tulaga maluga a te amanaia ne Paulo te tulaga o fafine kae e tau mo latou o tauloto a amioga o te loto pulea kae loto maualalo. Ko tena uiga, e seai se aoga e maua ne fafine te avanoa o tauloto kae e ola latou i te loto fia sili mo te fia maluga ka atili ei o uke a kinauga mo fifiga i loto i te galuega a te Atua.

4. I te ff. 12 ko aumai ne Paulo a te

faipatiga mo te fakatapuga o fafine. E se fakasaoloto ne au a fafine ke akoako atu io me ke pule a latou i luga o tagata, e tau mo latou o filemu. I te ff tenei ko fakaasi ne Paulo ona lagona totino e tusa e iloa ko te fakalavelave tenei ko sae mai i Efeso. I tulaga o te fakaogaaga o te gana Eleni. A veape konei e fakaoga ne Paulo e fakaoga i se mea tela manako ki ei a Paulo tela ko te taimi e iloa tena.(Present indicative verbs) I loto i te 13 o tusi a Paulo i te Feagaiga Fou, e tusa mo te. 2,835 o veape ne fakaoga i ana tusi kae e tusa mo te 1,429 ne veape kola e fakasino mo se mea loa e tupu i taimi tena io me ko present indicative verbs. Mo te fakaoga la ne Paulo a veape pela mo te E se fakasaoloto ne au ko fafine ke akoako atu, io me e pule i luga o tagata, ko tena uiga a te fakamafaaga a Paulo e mo te taimi e iloa tena e faipati ei a ia. E seai se manatu o Paulo ke fakapokotia ne ia se tulaga aka i se koga mo se taimi fakatea. E se gata i ei, a te faipatiga a Paulo e fakasino e iloa ki a ia, io me ko tena manatu totino.

E se se manatu kaufakatasi o te Ekalesia. Tela e fakaoga ne ia a te muna...'E se fakasaoloto ne au'. E fakaoga ne Paulo i se very personal level. Ko ia loa mo tena lagona. E se fakaoga foki ne Paulo tena fakatonuga tenei mo fafine katoa kae mo te fafine kola ko ola ia latou a lagona o te fia sili mo te fakamaualuga. E lavea ne tatou te tulaga tenei ona me ko aumai ne ia a te muna pela io mee pule i luga o tagata. Ko tena uiga e tenei tonu e iloa a fafine kola e faipati ki ei a Paulo, ko latou kola e fakaoga ne latou te avanoa o akoako atu kae ko nofo i ei a lagona fia maluga tela ko manatu latou me e maluga atu latou i tagata, kae e se fai pela ko fafine katoa.

5. Ona ko tulaga vaivai konei ko

pokotia ei te Ekalesia i Efeso, ne ala ei o aumai ne Paulo se fakamasauga e uiga mo te tulaga tonu tela e tau masaua ne fafine. Ko aumai ne ia ite ff 13 me ko Atamu ne faite muamu kae ko Eva ne faite fakamuli mai i te ivi kasokaso o Atamu. Ko atagia ei me ko te tagata ko te ulu o te kaiga e pena foki o fakatakitaki ki ei a te galuega a te Atua. E se foki i ei kae ko te fafine ne fakaloiloi muamua tela ne ka ii ei ne ia a te fuaga o te lakau.

E tau ate fakamasaua a Paulo me e tenei te tulaga e tau o iloa ne fafine. Paulo e nofo mo te pole me e mafai a Efeso o oko kit e tulaga tela ne oko ki ei a Eva. Tela ko te fakaosoosoga foki ki matua i Efeso ke maua ne latou a te tulaga maluga tela ne manako ki ei a Eva kae ne iku ki te agasala mo te tuli keatea ne te Atua i te fatoaga. Paulo e se manako ke oko ki ei a fafine i te Ekalesia i Efeso. E se gata i ei kafai e onoono tatou ki manatu o Paulo i te kesekesega o mea kola e mafai o fai ne fafine mo mea kola e mafai o fai ne tagata, a te autu tonu e fakasaga ki roles mo responsibilities o laua. Ko tena uiga e kesekese a la tusaga mo galuega e fai ne laua kae i mata o te Atua a laua e tasi eilola.

6. E uke a taimi e lavea ne tatou e faipati a Paulo ki te tasi o te tagata mo te fafine ke oko ki te amanaia ne Paulo a te fesoasoani o matua io me ko fafine i te galuega. I te Kalatia 3: 27-28...A koutou ne papatisogina i te sokotasi mo Keliso, kae nei a koutou ko fakapeigina ki te gatu fakatasi mo te ola o Keliso i a ia eilola. Tela la e seai se kesega i te va o tino lutaia mo tino fakatea, i te va o pologa mo tagata saoloto, i te va o tagata mo fafine. A koutou e tasi katoa i te soko tasi mo Keliso Iesu. E se gata i ei i te Galuega 16:14 io me ko Loma 16:1 Ko te tala o te matua ko

Litia i Filipi. Tenei te matua tela ko ia te tino muamua ne fuli ne Paulo i Eulopa. Kae ne lasi foki o fakaoga tena fale mo te fakalauefa kae talai atu a te Tala Lei. I te Tusi o Loma e fakaigoa ne Paulo a matua ko Fipe ko te tiakono tela se tofiga e faigata o maua ne se fafine. E se gata fua ia Fipe mo Litia kae e pena foki a te matua ko Evotia mo Sunetui.

Ko Pisila mo niisi matua tokouke ne galue fakatasi mo Paulo i te folafola o te Tala Lei. Mai i loto i kiloga konei e lavea ne tatou a taua o tusaga o te matua i loto i te Galuega o te talaiga o te Tala Lei a Keliso, e tena foki a te kiloga ki te mataupu tenei. Te fakamoemoega ke lavea ne tatou a te taua o tou tusaga takitokotasi kae ke se fai mo mea e fakatau futi ei a tatou me ko oi e maluga i te Ekalesia a te Atua.

Ke tasi a te malamalama o tatou me i te faipatiga tenei a Paulo it e 1 Timoteo 2: 11-15 e se ko tena uiga ko fakatapu lele eilola ne Paulo ko fafine ke akoako atu io me lauga atu te muna a te Atua. Kae ko te faipatiga e agai atu ne Paulo a tulaga fakamataku kola ko fakafeaagai mo te Ekalesia i Efeso maise ko tulaga o fafine i loto i te Ekalesia. E taua ke galue fakatasi a tatou tagata mo fafine i te galuega a te Atua me ko te finagalo tonu tenei mo te loto o te Atua mo tatou. Ko tona uiga a te faipatiga tenei a Paulo i te 1Timoteo 2:12 e 'se ko tena uiga e tapu a fafine o 'fau ki te tofiga fakafaifeau.Ke manuia koulua i te alofa o te Atua.

## **TE ITULAU PEPA MO PAGOTA**

Rev. Soama Tafia

Talofa koulua taugaso faifaitau i te Lama, konei a naai tala mai loto i te Fale Puipui

lasi o te atufenua i luga i Funafuti nei. E tumau a te galuega asiasi a te Ekalesia Kelisiano Tuvalu ki fanau a te atufenua kola e nofo i loto i te Fale Puipui maise i aso tolu mo aso tapu o vaiaso takitasi. Te Galuega Asiasi a te Ekalesia Kelisiano Tuvalu ki fanau pagota se auala tela ka mafai ei o fesoasoani ki fanau pagota e auala i fekau mai loto i te Tusi Tapu kola e taua mo te atiakega o te olaga faka-te-agaga e pena foki te olaga faka-te-foitino.

### **Mo Fanau Pagota**

A te lalolagi e olagaina ne tatou se lalolagi faigata aua e uke a fakaososoga mo mea faigata e fakafeagai mo tatou i aso takitasi. A ko tatou foki ne tino kola e ola i te lalolagi kae se mafai ne tatou o tele keatea mai fakalavelave tupu mo fakaososoga a te fili. Tela, i te ukega o taimi e se mafai ne tatou o agai atu a te fili mo ana fakaososoga tela ko mafai ei ne tatou o oko ki se tulaga faigata o te olaga kae ko pokotia foki ei a tou olaga. A te fai ne se tino se mea 'se tela ko pokotia foki ei a nisi tino se mea e se tonu mo te loto o te Atua aua te Atua ne manako ko tatou ke ola mo te manuia kae ke filemu foki a tou olaga.

A fakasalaga e oko ki luga i tatou ona ko te fai ne tagata a amioga masei kola e se tonu mo fakanofonofoga o te olaga faka-Tuvalu e pena foki a tulafono faka-te-malo. Kae e ui ei a tulaga o fakasalaga e oko tatou ki ei io me ne pefea foki a te 'mafa, a te mea e taua ke iloa ne tatou me ia tatou e taku eiloa ko fanau a te Atua. A te alofa o te Atua e tumau kae mautakitaki i luga ia tatou katoa tela e tasi ei tatou mo tino katoa. Muna a *Paulo 'Ko oi la ka mafai ne ia o 'vae tatou mai te alofa o Keliso? Ko te puapuaga, ko te faigata, ko te fakasaua, ko te oge, ko te mativa, ko te fakalavelave fakamataku, me ko te mate? .....E ui eiloa I mea katoa konei, e isi se manumalo katoatoa o tatou; e alatu i a ia tela ne alofa mai ki a tatou"* (Loma 8: 35, 37). E fakaasi mai ne

Paulo me i te alofa o Keliso ko te alofa o te Atua, ko te alofa tela e se mafai o fakatuakoigina, ko te alofa tela e iai se fakamoemoega ola i ei.

A te mea e taua mo tatou fanau pagota ko te salamo tonu mo te loto katoatoa ki mea 'se kola ko oti ne fai ne tatou. Ko te toe fakafouga o te olaga ko te mea ke mafai ne tatou o ola mo te fiafia kae fakatupu te filemu i loto tou atufenua pele. E taua foki i konei ko te mea ke kilo tatou fanau pagota ki fakatokaga a te Atua mo tou olaga mo tou kaiga mo aso mai mua. A te salamo tonu a tena uiga ko te 'fuli katoatoa o te olaga mai te masei ki te 'lei, kae talia Iesu Keliso ke pule ne ia tou loto mo tou olaga katoa.

Ke manuia koulua I te alofa kau fakatasi o te Atua

## **AKOAKOGA MUSIKA A TE TALAVOU EKT**

*Mr. Iakina Mautinoa*

I te po 30/06/2014 ki te po 04/07/2014 ne fai ei a te akoakoga fakamusika a fanau talavou a te EKT i luga i te laumua i te potu fai fonu a te Ulu Ofisa o te Ekalesia Kelisiano Tuvalu. E tenei foki eiloa te taimi muamua o fai se akoakoga kae 'kami mai sui takitokolua mai ekalesia mo talavou a fenua kae taki tokotasi mai kaulotu i luga i te laumua nei. A te akoakoga tenei se ikuga fonu i te 22 Fonu Lasi a te EKT i Nanumea 2012, i te mataupu a te Talavou Aoao ke fai se akoakoga musika ma fanau o te talavou a te EKT. Te akoakoga tenei ne 'tala aloaia ne te 'suga te Aoao ko Aso loapo, tela ko ia foki ko te Pelesitene o te talavou aoao a te EKT.

Te akoakoga e kamata i te itula e 9am i taeao ki te 3pm i te afaifi. E nofo ki luga i te tinogafulu mo te toko ono a talavou mai ekalesia/kaulotu mo fenua ne mafai o 'kaufakatasi mai ki te akoakoga tenei tela e tasi te vaiaso te leva. Se akoakoga e taua kae aoga mo fanau talavou, me e akoako ei, kae fetufaaki foki i ei a iloa mo malamalama i mea tau musika, se gata i ei ne taumafai foki e iloa o kia te akoakoga tenei e fesoasoani ei ki talavou i te fakaaogaga o te Tusi Pese o te 'lomiga lua a te EKT tela ko fakaaoga nei ne te lasiiga o ekalesia mo kaulotu a te EKT.

I te akoakoga fakamusika tenei, ne akoakogina ei a mea konei:

- ✓ Notation of Pitch – lina & vasia o laina, ituaiga sitafu etc...
- ✓ Notation of Durations – nota, piiti, manavaaga etc...
- ✓ Tonic Sol Fah – do, re, mi ....
- ✓ Rhythms – patoo
- ✓ Accidentals – nota oso vasaga
- ✓ Key & Time Signatures
- ✓ Simple & Compound Meter
- ✓ Piano Chart – te fakaaogaga o te piano/okani etc...
- ✓ Terms and sign
- ✓ Conducting
- ✓ Vocal exercise

Ne 'pono a te akoakoga fakamusika tenei i te 3 i te afaifi o te aso lima po 04/07. Ne mafai foki o maua te avanoaga o fanau talavou konei o fai tusaga i te usuuga o vikiga o te Atua e lua (2) i te tapuakiiga o te lotu taeao o te Aso Tapu po 06/07 i te ekalesia Funafuti, mai tua i ei ne fai a muna fakamalosi ki fanau talavou ke mafai o fakaaoga a te iloa mo te malamalama ko maua ne latou.

A te akoakoga fakamusika tenei ne mafai o fakataunigina ne te ofisa o pese a te EKT

fakatasi ei mo te fesoasoani mai te 'Suga Foutanu Vagalia.

## TALA O TE MALAGA KI NIUSILA – AUKILANI

### *Maina Talia*

Talofa te 'malu o koulua takaga faitau lama. Ne fai maua mo Nisha Tusitala mo sui o talavou ki te Fonotaga a te CWM Pasefika tela ne fai i Aukilani kamata mai i te po 22 Apelila ke oko ki te po 25. Kae ne toe fakasoko atu ki te fono lasi tela ne kamata i te 26 - 30 o Apelila. A te fono tenei a Talavou CWM Pacific mo te Fono Lasi a te CWM Pacific ko te fono lasi muamua loa ne fai i te Pasefika talu te taimi ne fakatu ei te CWM. I loto it e fonotaga tenei tela ko te fono muamua konei a mataupu ne lasi kii te faipatigina kola foki ne manatu a Talavou Pasefika me pokotia ei laua:

1. Suiga o Tau o Aso
2. Pule i te ola
3. Fakasuaaga i loto i kaiga

Mai luga i mataupu lasi konei e tolu, ne lasi te olo atu o matou o asiasi ki koga kola kooti ne fakatulagagina pela mo te Ofisa o Pulisimani i Henderson mo Te Wananga o Aotearoa tela se akoga ne fai mo tino Maori pela foki Pasefika kola ko se mafai o maua ne avanoaga i isi akoga. Te fakamoemoega o asiasiga konei, ke mafai o iloa ne fanau Pasefika, a vaega fesoasoani kola e mafai o maua ne tatou ma olo tatou ki Niusila, fesoasoani i feitu i mea tau tulafono (Police) mo fesoasani i mea tau akoakoga. Ne fesili au kia Nick Tuitasi tela se Samoa tela e fakatele ne ia akoakoga mo te Pasefika me mata e isi ne fanau Tuvalu e akoga i kona, kae tali mai me isi kae se napa foliki fua.

I loto i mataupu lasi konei ne sautalagina ne matou ne lavea foki ei ne au me e lasi kii te numiiga i loto loa i ofisa o talavou kola ne fakatele ne latou a polokalame ona me ko te fono muamua. E ui ei, ne seki fakavaivai a talavou o te Pasefika, kae ne taumafai loa latou ko te mea ke mafai o fai se pepa fakatautau (draft statement) a talavou ke mafai o avaka ki mataupu o te fono lasi. E fakafetai au mo te avanoga taua tenei, ne mafai ei maua mo Nisha o kau ki te fakatokaga o mataupu konei (drafting committee) kae ne mafai foki au o nofo ki te fono lasi a te CWM Pacific.

E se gata foki te fono a Talavou kae ne mafai foki o fai te fono a matua o te Pasefika. Te fono a latou tenei ne fai tasi loa mo te fono a Talavou e fakatoka foki ei olotou mataupu e uiga ki te Fono Lasi tenei. A sui o tatou ko te Matua tenei ko Lesipa Semisi mo te Matua ko Oliula Kalahati.

A te fono a Talavou fakatasi mo te Fonolasi a te CWM e galue i lalo o te theme “Turning the tides of Tradition” (Suiga o te ‘au o faifaiga masani). E lavea i loto i sautalaga fakatalavou pela foki te fono lasi me e se faigofie te suiga o te tafega o te ‘au masani o faifaiga fakafenua, fakaekalesia kola ne ola kae ne mafuta mai ei tatou i aso ko teka.

Ka onoono tatou ki loto i niisi mataupu fou pela mo te Saolotoga o te tagata (Human Rights) e lavea ne tatou i te kiloga fakapasefika me ko fai mo aula e fai ei mo fakamasakoga a tou tino i te se fai ne latou te mea e tau o fai ona ko tona saolotoga. E uke aka foki niisi mea kola e lavea ne tatou e fai o auala e fakafaigata ei te talia ne tatou a suiga fou konei. Ne iku i Talavou ko te mea e se faigofie loa te fuli ne tatou o mea kola ko masani ei tatou, e mafai, kae e vau te taimi e fuli ei.

‘Malu o te kau faitau lama, se avanoga e taua kii, kae maise ei ke mafai o fakamau fakalei te uluaki fono tenei a Talavou CWM Pacific mo aso mai mua. E manakogina ko talavou ke fakaoga ne latou avanoaga konei, o finau malosi a mataupu taua kola e lavea ne laua e pokotia io me mafai o pokotia ei a olaga o latou i aso mai mua. I te avanoga taua tenei e moli te ma fakafetai mo Nisha ki te Ofisa o te EKT mo te tuku mai olotou talitonuga o latou ke sui ne maua mo Nisha a te Talavou a ‘tou EKT.

## TALA O TE VASEGA KO TE KAKEATU

*Rev. Eti Kine*

**DATE: 6/04/2011**

A te vasega ko te KAKEATU I tena tala tukufakasolopito, ne mafua o fakatuu ona ko te mea ke mafai o fesoasoani kite fakaleiga ote tulaa o mea tau akoakoga ite akoga ate Ekalesia Kelisiao Tuvalu ko Motufoua. Ko latou ne aofia I loto ote vasega tenei i te vaitaimi tena ne tamaliki tagata eilola kola ne akoga ite Motufoua, m to fakamoemoega o latou ke salasala ne tupe ma latou o fesoasani ei ki kautama o Elise I loto I Motufoua I aso kona.

Ne kamata a te vasega tenei o lukuluku ne tupe a latou mai I fenua takitasi o Elise, e aofia i ei a te fenua ko Panapa, Nauru mo Tarawa, kae ne fakaigoa ne latou a te vasega tenei ko te MOBA, tela ko te “Motufoua Old Boys Association”- 1917.

I te tausaga e 1964 tela ne fai ei a te Fonotaga ate Ekalesia Elise I Funafuti, e tena foki a te tausaga ne talia ei ke ulu ate vasega tenei ko te MOBA ki loto I

vasega a te Ekalesia Elise. I te fonotaga foki tenei ne filigina ei a latou konei ke fai mo Komiti/Ofisa o te vasega.

- Rev: Ualetenese. Mose – Pelesitene
- Rev: Morikao Kaua – Failautusi
- Elder Latasi Kamuta – Teutupe

Mai I te tausaga e 1964 ki te 1966 tela ne fai ei te Fono ate Ekalesia I Niutao ne fanofano lei eiloa a te vasega tenei i mea tau sene mo Motufoua

Kote tausaga e 1970 tela ne fai ei a te Fono Lasi a te Ekalesia i Nui ne talia ei ke ulu kite Vasega tenei sose tino Elise tela ne akoga I sose akoga. Tela ne fuli ei a te igoa MOBA kite EOSA, tela kit e “Elise Old Student Association.”

Mai I te tausaga e 1972-1974 ne tumau a te solosolo lei mo te ola o te Vasega. Tela ne talia I te Fonotaga a te Ekalesia I Nanumaga I te tausaga I te tausaga 1974, ke togi ne te EOSA a te faitega o te falemoa o tamaliki tagata I Motufoua e tusa mo te \$10,000 tela ne fakaulufale I te fonotaga a te Ekalesia I Vaitupu I te 1976. Ko te tausaga foki tenei I te fonotaga ne fuli ei a te igoa ko EOSA ki te TOSA tela ko te “Tuvalu Old Student Association” ona ko te tausaga foki tenei n e mavae mai ei a te Tuvalu Elise mai Kilipati.

Ne toe fakamafuli a te igoa o te vasega mai i te TOSA ki te KAKEATU tela ko te “Kaiga Kelisiano Akoga Tuvalu” I te fono a te Ekalesia I te tausaga 1984 I Funafuti, ko te mea ke tuku matala ki sose tino o te Ekalesia Kelisiano Tuvalu e fia kau o fesoasoani ki akoga a te Ekalesia Kelisiano Tuvalu (EKT).

I te vaitaimi nei a te KAKEATU e saga malosia o salasala sene o fesoasoani ki mea tau akoga a te EKT, pela mo akoga Asotapu, kae maise te Akoga Lasaga Lua ko te Fetuvalu High School.

Ofisa o te KAKEATU Aoao a te EKT-14/07/13

1. Pelesitene- Kalisi Pulekai (Funafuti)
2. Tokolua Pelesitene- Mataio Liai (Fakaifou)
3. Failautusi- Fialei Sikela (Funafuti)
4. Teutupe- Talesi Honolulu (Vaiaku)

**NB:**

- MOBA- 1917= 97yrs (2014)
- KAKEATU-1964= 50yrs (2014)

## MO TAMALIKI

### *Aso loapo*

Ko toe fakatalofa atu a te Lama o te tausaga tenei 2014 kia koulua tamaliki i te alofa mo te agalelei o te Atua. Talitonu te lotu koi nofo koulua o tauloto a te poto mo te atamai i lotu i potu akoga kesekese. Kae ko taumafai atu a te Lama tenei, o fakamanava a lua mafaufau kise tala toetoe kae taua mo tou olaga faka-tamaliki.

E isi se matua mo tena tamaliki tagata e tokotasi ne ola aka laua i lotu i te la kaiga i se olaga faigata. Te tamaliki tagata tenei e maua ne te masaki ko te kivi ona mata. Tela tena olaga ko te nofonofo loa i lotu i te fale. Te galuega a te matua ko te fano sale o sala mai ne meakai mo tausi a olaga o laua mo tena tamaliki tagata tenei.

Te tamaliki tagata tenei e faigata o fano ki tua mo te la fale, e gata loa tena fanofano i lotu i te fale o laua. I te aso e tasi ko vau loa te fita o te matua tenei i te fano sale o sala mai ne meakai ma laua. Tena faipati atu ei a te matua tenei ki

tena tama. Taku tama- tapa koe na e isi sou mafaufau. Koe na ko te nofonofo loa pena seai loa sou aoga ki loto i ta kaiga tenei. Tapa au ko fita aka loa i te fano soko o sala mai ne meakai ma taua. Kaati e lei ke fano aka koe i se taimi o sala aka ne meakai ma taua, kae ke manava aka tou matua. Tamaliki ko oko loa a te fakalofa o te tamaliki tagata tenei. Ona ko pati a tena matua konei e fai atu kia ia. Muna te tamaliki tagata tenei- toku matua pele au ko oko loa toku alofa kia koe.

E lagona ne au ki toku loto a te mafa o te amoga e tauave ne koe. E lagona foki neau a tou fita. I te taimi ne tausi ei ne koe au mai i taku folikiiga ke oko mai loa ki te taimi tenei ko matua ei au. Au e takotonu atu kia koe toku matua. Au e pela fua mese pula o te lakau ko magemage. Ko seai se manogi e mafai o maua mai ei. Ko seai foki se aoga o te teu pulalaku tenei kia koe toku matua pele. E pena foki toku olaga i te taimi tenei, ko seai se aoga. Toku olaga ko aginagina fua ne te matagi. Ko seai se tino e mafai o fesoasoani kia koe. Au ko se aoga, au foki ko se manakogina. Kae ui ei toku matua- au ko taumafai ki te mea tela e mafai neau o fai. Ko te mea ke mafai foki neau o tau i atu a tou alofa lasi mo au. Mene oko ki fea te olaga, io me pefea te gataaga o taku taumafaiga. Mummy koe loa ke malie mai tou loto.

Tamaliki kona a pati a te tamaliki kivi tenei ki tena matua. Tela ne faitali eiloa aia ki po, ko te mea loa ko fano aia o sala mai se mea e mafai o ola ei laua mo tena matua. Fai mai te tala me i te matua ko to tena moe i te fale. Kae ko tena tama tagata tenei kivi, ko fano ki tua mo te fale o laua. Ne sasale atu a te tamaliki tagata tenei fetai ei a ia mo tino masei i te auala. Ne fakamolemole atu a te tamaliki kivi tenei ki tagata konei me isi ne olotou sene. Kae

fakafanoanoa te loto, me i tino masei konei ne taa ne latou tamaliki tagata kivi tenei. Tapa tamaliki logofio loa te tamaliki tenei, kae ne maua loa tena malosia o toe fakasoko atu tena malaga. Ne takasese atu te tamaliki tagata tenei, oko atu ei aia kise fale e tasi e tuu mai i te kogakoga tena. Ne pakalaga tou tagata mo se fesoasoani. Ko te mea loa ko tele mai a tino, ne puke aka tamaliki tenei ne se tauavaga, ave ei ne laua ki loto i te fale o fai fakalei ana pakiaga. Ne fesili atu te tauavaga konei kia ia, me sea te mea ne tupu. Ko te mea loa ko fakamatala katoa ne tamaliki kivi tenei a te tulaga mo te mafuaga ne tupu ei a te fakalavelave.

Tamaliki a te tauavaga konei ne faifeau o te fakai tena. Ne fai atu te tamaliki tenei, fakamolemole oku mata nei e kivi toku matua tela e moe i te fale. Fakafoki aka au ki te ma fale mo toku matua. Ne lagona ne te tauavaga faifeau konei a te alofa, ona ko te tulaga o te olaga o te tamaliki tenei mo tena matua. Tela ne olo ei o puke mai te matua o te tamaliki tenei ke nofo tasi latou. Ne vau te matua tenei, kae kilo ki foliga o tena tama, ko te mea eiloa ko tagi kae fakatoese kiei.

Ana muna- taku tama kaia ne fai ei ne koe se mea pena. Fakamolemole fakamagalo mai au, ko lagona neau a toku se ona ko aku pati ne fai atu kia koe. Muna tena tama-mummy se tagi, au e talitonu toku loto me ia koe se matua e alofa. Au muna kola ne fai mai kia au, ne muna o te fita o koe ona koau seai soku aoga i te kaiga. Kae ui ei ko gata i konei taku taumafaiga, kae fakafetai ki te alofa o te Atua, mene takitaki mai neia au ki te fale o tena tavini faifeau tenei ko te mea ke mafai ei ne taua o maua se fesoasoani mo taa olaga katoa.

Tamaliki tena te tala mo tatou, kae uke kii loa a akoakoga mo mea taua kola e mafai



o maua ne tatou mai loto i te tala tenei. E mafai o lavea ne tatou a te tulaga o te matua mo tena tausiga kia taua fanau. Nisi matua e alofa tonu loa kia taua tamaliki. Nisi matua e alofa nei ka oti ko fita. Nisi matua e fita vave ia taua fanau. Mea na ko te kiloga a taua fanau ki matua. Kae ke masaua ne taua tamaliki, mene iku ki fea a te olaga tenei, a te matua e faigata o tiakina ne ia taua tamaliki. Me ia taua tamaliki ne meaalofo taua kola ne tuku mai kite matua mo te tamana ne te Atua. Tenei foki e iloa a te ata fakaasi o te Atua kia tatou. Mene oko ki fea a te tulaga o te olaga e olagina ne tatou faka-tamaliki, kae ko te Atua e alofa mai faeloa. Faitali me ia taua ne fanau e vaivai kae se katoatoa, kae e fakaoga faeloa neia ta olaga. Tela la tamaliki, tauloto malosi kae saga tonu ki te akoga, ko te mea ke tausi ne taua ta matua i aso fakamuli manafai ko isi ne koga gali e mafai o galue taua i ei. Masaua ke se puli ia koe a mummy mo daddy i tou olaga katoa.....Amene